

出新纂大日本續藏經數位版, No. 1336 龐居士語錄
出新纂大日本續藏經 龐居士語錄

節度使 于頔 編集 優婆塞 世燈 重梓

2023年08月28日

龐居士語錄卷上

語錄

襄州居士龐蘊。字道玄。衡州衡陽縣人也。世本儒業。少悟塵勞。志求真諦。唐貞元初。謁石頭禪師。乃問。不與萬法為侶者是甚麼人。頭以手掩其口。豁然有省。一日。石頭問曰。子見老僧以來。日用事作麼生。士曰。若問日用事。即無開口處。頭曰。知子恁麼方始問子。士乃呈偈曰。日用事無別。唯吾自偶諧。頭頭非取捨。處處沒張乖。朱紫誰為號。丘山絕點埃。神通并妙用。運水與搬柴。頭然之曰。子以緇耶。素耶。士曰。願從所慕。遂不剃染。

居士後之江西參馬祖大師。問曰。不與萬法為侶者是什麼人。祖曰。待汝一口吸盡西江水即向汝道。士於言下頓領玄旨。遂呈偈。有心空及第之句。乃留駐。參承二載。有偈曰。有男不婚。有女不嫁。大家團圓頭。共說無生話。士一日又問祖曰。不昧本來人。請師高著眼。祖直下。士曰。一等沒絃琴。惟師彈得妙。祖直

上。士禮拜。祖歸方丈。士隨後曰。適來弄巧成拙。士一日又問祖曰。如水無筋骨。能勝萬斛舟。此理如何。祖曰。這裏無水亦無舟。說什麼筋骨。居士到藥山禪師。山問曰。一乘中還著得這箇事麼。士曰。某甲祇管日求升合。不知還著得麼。山曰。道居士不見石頭。得麼。士曰。拈一放一。未為好手。山曰。老僧住持事繁。士珍重便出。山曰。拈一放一的是好手。士曰。好箇一乘問宗。今日失却也。山曰。是。是。居士因辭藥山。山命十禪客相送。至門首。士乃指空中雪曰。好雪片片。不落別處。有全禪客曰。落在甚

處。士遂與一掌。全曰。也不得草草。士曰。恁麼稱禪客。閻羅老子未放你在。全曰。居士作麼生。士又掌曰。眼見如盲。口說如瘡。

居士到齊峰。纔入院。峰曰。箇俗人頻頻入院。討箇什麼。士乃回顧兩邊曰。誰恁麼道。誰恁麼道。峰便喝。士曰。在這裏。峰曰。莫是當陽道麼。士曰。背後底響。峰回首曰。看看。士曰。草賊大敗。草賊大敗。峰一日與居士並行次。士乃前行一步曰。我強如師一步。峰曰。無背向老翁。要爭先在。士曰。苦中苦。未是此一句。峰曰。怕翁不甘。士曰。老翁若不堪。齊峰堪作箇什麼。峰曰。若有棒在手。打不解倦。士便行一擲。曰。不多好。峰始拈棒。被居士把住曰。這賊今日一場敗闕。峰笑曰。是我拙。是公巧。士乃撫掌曰。平交。平交。居士一日又問峰曰。此去峰頂有幾里。峰曰。是什麼處去來。士曰。可畏。

峻硬。不得問著。峰曰。是多少。士曰。一二三。峰曰。四五六。士曰。何

不道七。峰曰。纔道七。便有八。士曰。住得也。峰曰。一任添取。士喝便出。峰隨後亦喝。居士一日又問。不得堂堂道。峰曰。還我怎麼時龐公主人翁來。士曰。少神作麼。峰曰。好箇問訊。問不著人。士曰。好來。好來。丹霞天然禪師一日來訪居士。纔到門首。見女子靈照携一菜籃。霞問曰。居士在否。照放下菜籃。斂手而立。霞又問。居士在否。照提籃便行。霞遂去。須臾。居士歸。照乃舉前話。士曰。丹霞在麼。照曰。去也。士曰。赤土塗牛。嬾霞隨後入見居士。士見來。不起亦不言。霞乃豎起拂子。士豎起槌子。霞曰。只恁麼。更別有。士曰。這回見師。不似於前。霞曰。不妨減人聲價。士曰。比來拆你一下。霞曰。恁麼則瘧却天然口也。士曰。你瘧繇本分。累我亦瘧。霞便擲下拂子而去。士召曰。然闍黎。然闍黎。霞不顧。士曰。不惟患瘧。更兼患聾。丹霞一日又訪居士。至門首相見。霞乃問。居士在否。士曰。饑不擇食。霞曰。龐老在否。士曰。蒼天。蒼天。便入宅去。霞曰。蒼

天。蒼天。便回。霞一日問居士。昨日相見何似今日。士曰。如法舉昨日事來。作箇宗眼。霞曰。祇如宗眼還著得龐公麼。士曰。我在你眼裏。霞曰。某甲眼窄。何處安身。士曰。是眼何窄。是身何安。霞休去。士曰。更道取一句。便得此語圓。霞亦不對。士曰。就中這一句。無人道得。居士一日向丹霞前叉手立。少時却出去。霞不顧。

士却來坐。霞却向士前叉手立。少時便入方丈。士曰。汝入我出。未有事在。霞曰。這老翁出出入入。有甚了期。士曰。却無些子慈悲心。霞曰。引得這漢到這田地。士曰。把什麼引。霞乃拈起士幞頭曰。却似一箇老師僧。士却將幞頭安霞頭上曰。一似少年俗人。霞應喏三聲。士曰。猶有昔時氣息在。霞乃拋下幞頭曰。大似一箇烏紗巾。士乃應喏三聲。霞曰。昔時氣息爭忘得。士彈指三下。曰。動天動地。丹霞一日見居士來。便作走勢。士曰。猶是拋身勢。怎生是嚙呻勢。霞便坐。士乃回前。以拄杖劃地作七字。霞於下面書

箇一字。士曰。因七見一。見一忘七。霞曰。這裏著語。士乃哭三聲而去。居士一日與丹霞行次。見一泓水。士以手指曰。便與麼也還辦不出。霞曰。灼然是辦不出。士乃辱水潑霞二掬。霞曰。莫與麼。莫與麼。士曰。須與麼。須與麼。霞却辱水潑士三掬。曰。正與麼時。堪作什麼。士曰。無外物。霞曰。得便宜者少。士曰。誰是落便宜者。

百靈和尚一日與居士路次相逢。靈問曰。昔日居士南嶽得力句。還會舉向人也無。士曰。曾舉來。靈曰。舉向什麼人。士以手自指曰。龐公。靈曰。直是妙德空生也讚嘆不及。士却問。阿師得力句是誰得知。師戴笠子便行。士曰。善為道路。靈更不回首。靈一日問居士。道得道不得俱未免。汝且道未免箇什麼。士以目瞬之。靈曰。奇特更無此也。士曰。師錯許人。靈曰。誰不恁麼。誰不恁麼。士珍重而去。靈一日在方丈內坐。士入來。靈把住曰。今人道。古人道。居士作麼生道。士打靈一掌。靈曰。不得。

不道。士曰。道即有過。靈曰。還我一掌來。士近前曰。試下手看。靈便珍重。居士一日問百靈曰。是這箇眼目免得人口麼。靈曰。作麼免得。士曰。情知。情知。靈曰。棒不打無事人。士轉身曰。打。打。靈方拈棒起。士把住曰。與我免看。靈無對。

居士一日見大同普濟禪師。拈起手中筴籬曰。大同師。大同師。濟不應。士曰。石頭一宗。到師處冰消瓦解。濟曰。不得龐翁舉。灼然如此。士拋下筴籬曰。寧知不直一文錢。濟曰。雖不直一文錢。欠他又爭得。士作舞而去。濟提起筴籬曰。居士。士回首。濟作舞而去。士撫掌曰。歸去來。歸去來。濟一日問居士。是箇言語。今古少人避得唇舌。只如翁避得麼。士應喏。濟再舉前話。士曰。什麼處去來。濟又舉前話。士曰。什麼處去來。濟曰。非但如今。古人亦有此語句。士作舞而去。濟曰。這風顛漢。自過教誰點檢。普濟一日訪居士。士曰。憶在母胎時。有一則語。舉似阿師。切不得作道理。

主持。濟曰。猶是隔生也。士曰。向道不得作道理。濟曰。驚人之句。爭得不怕。士曰。如師見解。可謂驚人。濟曰。不作道理。却成作道理。士曰。不但隔一生兩生。濟曰。粥飯底僧。一任點檢。士彈指三下。居士二日去看普濟。濟見居士來。便掩却門曰。多知老翁。莫與相見。士曰。獨坐獨語。過在阿誰。濟便開門。纔出。被士把住曰。師多知。我多知。濟曰。多知且置。閉門開門。卷之與舒。相較幾

許。士曰。祇此一問。氣急殺人。濟嘿然。士曰。弄巧成拙。居士到長髭禪師。值上堂。大眾集定。士便出云。各請自檢好。髭便示眾。士却於禪床右立。時有僧問。不觸主人公。請師答話。髭云。識龐公麼。僧云。不識。士便搗住其僧云。苦哉。苦哉。僧無對。士托開。髭少間却問士云。適來這僧還喫棒否。士云。待伊甘始得。髭云。居士只見錐頭利。不見鑿頭方。士云。怎麼說話。某甲即得。外人聞之。要且不好。髭云。不好箇甚麼。士云。阿

師只見鑿頭方。不見錐頭利。

居士同松山和尚喫茶次。士舉橐子曰。人人盡有分。為什麼道不得。山曰。祇為人人盡有。所以道不得。士曰。阿兄為什麼却道得。山曰。不可無言也。士曰。灼然。灼然。山便喫茶。士曰。阿兄喫茶。為什麼不揖客。山曰。誰。士曰。龐公。山曰。何須更揖。後丹霞聞。乃曰。若不是松山。幾被箇老翁惑亂一生。士聞之。乃令人傳語霞曰。何不會取未舉橐子時。居士一日與松山看耕牛次。士指牛曰。是伊時中更安樂。只是未知有。山曰。若非龐公。又爭識伊。士曰。阿師道渠未知有箇什麼。山曰。未見石頭。不妨道不得。士曰。見後作麼生。山撫掌三下。居士一日到松山。見山携杖子。便曰。手中是箇什麼。山曰。老僧年邁。闕伊一步不得。士曰。雖然如是。壯力猶存。山便打。士曰。放却手中杖子。致將一問來。山拋下杖子。士曰。這老漢。前言不付後語。山便喝。士曰。蒼天中更有怨苦。居士一日與松山行次。見

僧擇

菜。山曰。黃葉即去。青葉即留。士曰。不落黃葉。又作麼生。山曰。道取。士曰。不為賓主。大難。山曰。只為強作主宰。士曰。誰不恁麼。山曰。不是。不是。士曰。青黃不留處。就中難道。山曰。也解恁麼去。士珍重大眾。山曰。大眾放你落機處。士便行。一日。松山與居士話次。山驀拈起案上尺子云。還見這箇麼。士曰。見。山曰。見箇什麼。士曰。松山。松山。山曰。不得不道。士曰。爭得。山乃拋下尺子。士曰。有頭無尾得人憎。山曰。不是翁。今日還道不及。士曰。不及箇什麼。山曰。有頭無尾。士曰。強中得弱即有。弱中得強即無。山抱住居士曰。這個老子。就中無話處。居士問本谿和尚。丹霞打侍者。意在何所。谿曰。大老翁見人長短在。士曰。為我與師同參。方敢借問。谿曰。若恁麼。從頭舉來。共你商量。士曰。大老翁不可共你說人是非。谿曰。念翁年老。士曰。罪過。罪過。本谿一日見居士來。

乃目視多時。士乃將杖子畫一圓相。谿便近前以腳踏。士曰。是什麼。是什麼。谿却於居士前畫一圓相。士亦以腳踏。谿曰。來時有。去時無。士抱拄杖而立。谿曰。來時有。去時無。士曰。幸自圓成。徒勞目視。谿拍手曰。奇特。一無所得。士拈杖子點點而去。谿曰。看路。看路。士曰。是什麼。是什麼。

居士訪大梅禪師。纔相見。便問。久嚮大梅。未審梅子熟也未。梅曰。熟也。你向什麼處下口。士曰。百雜碎。梅伸子曰。還我核子來。士便去。

居士到芙蓉山大□禪師處。□行食與居士。士擬接。

毓縮手曰。生心受施。淨名早訶。去此一機。居士還甘否。士曰。當時善現。豈不作家。毓曰。非關他事。士曰。食到口邊。被他奪却。毓乃下食。士曰。不消一句子。士又問毓曰。馬大師著實為人處。還分付吾師否。毓曰。某甲尚未見他。作麼生知他著實處。士曰。祇此見知也無討處。毓曰。居士也不

得一向言說。士曰。一向言說。師又失宗。若作兩向三向。師還開得口否。毓曰。直是開口不得。可謂實也。士撫掌而出。

居士相看則川和尚次。川曰。還記得見石頭時道理否。士曰。猶得阿師重舉在。川曰。情知久參事慢。士曰。阿師老耄不啻龐公。川曰。二彼同時。又爭幾許。士曰。龐公鮮健。且勝阿師。川曰。不是勝我。祇欠汝箇幞頭。士拈下幞頭曰。恰與師相似。川大笑而已。一日。則川摘茶次。士曰。法界不容身。師還見我否。川曰。不是老僧。洎答公話。士曰。有問有答。盖是尋常。川乃摘茶不聽。士曰。莫怪適來容易借問。川亦不顧。士喝曰。這無禮儀老漢。待我一舉向明眼人。川乃拋却茶籃。便歸方丈。川一日在方丈內坐。士見曰。只知端坐方丈。不覺僧到參時。川垂下一足。士便出。三兩步却回。川却收足。士曰。可謂自由自在。川曰。爭奈主人何。士曰。阿師只知有主。不知有客。川喚侍者點茶。士乃作舞而出。

居士到洛浦禪師。拜起。曰。仲夏毒熱。孟冬薄寒。浦曰。莫錯。士曰。龐公年老。浦曰。何不寒時道寒。熱時道熱。

士曰。患聾作麼。浦曰。放汝二十棒。士曰。瘧却我口。塞却汝眼。

石林和尚見居士來。乃豎起拂子曰。不落丹霞機。試道一句子。士奪却拂子。却自豎起拳。林曰。正是丹霞機。士曰。與我不落看。林曰。丹霞患瘧。龐公患聾。士曰。恰是。林無語。士曰。向道偶爾。林一日問居士。某甲有箇借問。居士莫惜言語。士曰。便請舉來。林曰。元來惜言語。士曰。這箇問訊。不覺落他便宜。林乃掩耳。士曰。作家。作家。林一日自下茶與居士。士纔接茶。林乃抽身退後曰。何似生。士曰。有口道不得。林曰。須是怎麼始得。士拂袖而去。曰。也太無端。林曰。識得龐翁也。士却回。林曰。也太無端。士無語。林曰。也解無語去。

居士訪仰山禪師。問。久響仰山。到來為甚麼却覆。山豎起拂子。士曰。恰

是。山曰。是仰是覆。士乃打露柱曰。雖然無人。也要露柱證明。山擲拂子曰。若到諸方。一任舉似。

居士訪谷隱道者。隱問曰。誰。士豎起杖子。隱曰。莫是上上機麼。士拋下杖子。隱無語。士曰。只知上上機。不覺上上事。隱曰。作麼生是上上事。士拈起杖子。隱曰。不得草草。士曰。可憐強作主宰。隱曰。有一機人。不要拈槌豎拂。亦不用對答言辭。居士若逢。如何則是。士曰。何處逢。隱把住。士乃曰。莫這便是否。驀面便睡。隱無語。士與一頌曰。焰水無魚下底鉤。覓魚無處笑君愁。可憐谷隱孜禪伯。被睡如今見亦羞。

居士因在床上臥看經。有僧見曰。居士看經。須具威儀。士翹起一足。僧無語。居士一日在洪州市賣竺籬。見一僧化緣。乃將一文錢問曰。不辜負信施道理。還道得麼。道得即捨。僧無語。士曰。汝問我。與汝道。僧便問。不辜負信施道理。作麼生。士曰。少人聽。又曰。會麼。僧曰。不會。士曰。是誰不會。

居士一日見牧童。乃問。路從什麼處去。童曰。路也不識。士曰。這看牛兒。童曰。這畜生。士曰。今日什麼時也。童曰。插田時也。士大笑。

居士嘗遊講肆。隨喜金剛經。至無我無人處。致問曰。座主既無我無人。是誰講。誰聽。主無對。士曰。某甲雖是俗人。粗知信向。主曰。祇如居士。意作麼生。士以偈答曰。無我復無人。作麼有疎親。勸君休歷座。不似直求真。金剛般若性。外絕一纖塵。我聞并信受。總是假名陳。主聞偈。欣然仰嘆。居士所至之處。老宿多往復。酌問皆隨機應響。非格量軌轍之可拘也。居士一日在茅廬裡坐。驀忽云。難。難。難。十碩油麻樹上攤。龐婆云。易。易。易。如下眠床脚踏地。靈照云。也不難。也不易。百草頭上祖師意。元和中。居士北遊襄漢。隨處而居。有女靈照。常鬻竹漉籬。以供朝夕。士有偈曰。心如境亦如。無實亦無虛。有亦不管。無亦不拘。不是賢聖。了事凡夫。易復易。即此五蘊有真智。十方世界一乘同。無相法身豈有二。

若捨煩惱入菩提。不知何方有佛地。護生須是殺。殺盡始安居。會得箇中意。鉄船水上浮。

居士一日坐次。問靈照曰。古人道。明明百草頭。明明祖師意。如何會。照曰。老老大大。作這箇語話。士曰。你作麼生。照曰。明明百草頭。明明祖師意。士乃笑。

居士因賣漉籬。下橋喫撲。靈照見。亦去爺邊倒。士曰。汝作什麼。照曰。見爺倒地。某甲相扶。

居士將入滅。謂靈照曰。視日早晚。及午以報。照遽報。日已中矣。而有蝕也。士出戶觀次。照即登父座。合掌坐亡。士笑曰。我女鋒捷矣。于是更延七日。州牧于頔問疾。士謂之曰。但願空諸所有。慎勿實諸所無。好住世間。皆如影響。言訖。枕于公膝而化。遺命焚棄江。緇白傷悼。謂禪師龐居士即毗耶淨名矣。有詩偈三百餘篇傳於世。

龐居士語錄卷上

龐居士詩卷中

詩

五言

楞伽寶山高四面無行路惟有達道人乘空到彼處羅漢若悟空擲錫騰空去緣覺若
悟空醒見三生事菩薩若悟空

十方同一處諸佛若悟空妙理空中住空理真法身法身即常住佛身祇這是迷人自
不悟一切若不空苦厄從何度大海濶三千巨深五六萬余特七尺軀入裏飲一頓當
時枯竭盡龍王自出現大閱經藏門請為說一遍依如說無法龍王悟知見賣君髻中

珠隱在如來殿戴將軍陣頭賊降不敢戰世上有仁人得永離貧賤不貪有為身當見
如來面日輪漸漸短光陰一何促身如水上沫命似當風燭常須慎四蛇持心捨三毒
相見論修道更莫著姪慾姪慾暫時情長劫入地獄縱令得出來異形人不識或時成
四足或是總無足可惜好人身變作醜頭畜今日預報知行行須努力余家久住山早
已離城市草屋有三間一間長丈二一間安葛五一間塵六四余家自內房終日閑無
事昨因黑月二十五初夜飲酒醉兩人相渾雜種種調言氣余家不柰煩放火燒屋
葛五成灰燼塵六無一二有物蕩淨盡惟餘空閑地自身赤裸裸體上無衣被更莫憂
盜賊逍遙安樂睡一等被火燒同行不同利出家捨煩惱煩惱還同住癡心覓福田
駭意承救度十二因緣管無繇免來去依智不依識依義不依語佛心一子地蠢動皆
男女平等如虛空善惡俱無取既不造天堂誰受三塗苦有法盡無餘乘空能自度神
作如來身智作如來庫涌出波羅蜜流通正道路渾身總是佛迷人自不悟八十隨形
好相有三十二四諦及三乘同一無生智名為一合相非是人同類凡夫共佛同一體

無有異若論心與境懸隔不相似凡夫惟妄想攀緣徧天地常懷三毒心損他將自利
佛心常慈悲善惡無有二蠢動諸眾生心同一子地六識空無生六塵將布施意根成
妙覺七識平等智富兒空手行貧兒把他物被物牽入塵買賣不得出覺暮便歸舍黃
昏黑漆漆所求不稱意合家總啾唧自無般若性乏欠波羅蜜把繩入草裏自繫百年
畢實是可憐許冥冥不見日富兒雖空手家中甚富溢自有無盡藏不假外緣物周流
用不窮要者從理出古時不異今今時不異古生事日日滅有所不能作音做世上乏
錢財守空無貨賂

理詩日日新朽宅時時故聞船未破漏愛河須早渡出過三江口逍遙神自悟損之又
損之俄成貝多樹臨行途路難無船可相渡業老見閻公沒你分踈處若見優曇花處
處無疑慮世上蠢蠢者相見只論錢張三五百貫李四有幾千趙大折却本王六大迤
迤口常談三業心中欲火然癡狼咬肚熱貪鬼撮頭牽有脚復有足開眼常睡眠羅刹
同心腹何日見青天青天不可見地獄結因緣故宅守真妻不好求外色真妻生男女

長大同榮辱外色有男女長成愛作賊有妻累我來牽我入牢獄我亦早識渠誘引入
吾室內外總團圓同滾一鉢食飽斷虛妄無相即無福若論真寂理同歸無所得昔
日在有時常被有人欺一相生分別見聞多是非已後入無時又被無人欺一向看心
坐冥冥無所知有無俱是執何處是無為有無同一體諸相盡皆離心同虛空故虛空
是我師若論無相理惟我父王知老來無氣力房舍不能修基頽柱根朽椽栳脫差抽
泥塗零落盡四壁空颼颼舉頭看梁柱星星見白頭慧雲降法雨

智水沃心流家中空豁豁屋倒亦何憂山莊草庵破余歸大宅游生生不揀處隨顚說
無求人有五般花花蘭一作爛變成香氤氲滿故宅供養本爺娘有人見不識報道十
月桑外塵一念愛合成五色囊囊中起三柱柱上有千梁梁邊成地獄地獄作天堂緣
箇一群賊自作自消亡縱令存革命何時還故鄉文字說定慧定慧是爺娘何不依理
智逐色在他鄉早須歸大宅孝順見爺娘爺娘聞子來端坐見哈哈我所有寶藏分付
鑰匙開非論窮子富舉國免三灾如意用無盡更不受胞胎逍遙無障礙終日見如來

如來愍諸子平等無高下諸子自愚癡所以難教化直心是道場子心轉姦詐遣子淨
三業轉愛論俗話遣子內脩真向外轉尋假遣子學無相捻他有相把無諍最第一論
義成相罵無貪勝布施無癡勝坐禪無瞋勝持戒無念勝求緣盡見凡夫事夜來安樂
眠寒時向火坐火本實無煙不忌黑闇女不求功德天任運生方便皆同般若船若能
如是學功德實無邊十方同一等此是真如寺裏有無量壽

本來無名字凡夫不入理心緣世上事乞錢買瓦木盖他虛空地却被六賊驅背却真
如智終日受艱辛妄想圖名利如此學道人累劫終不至無有報龐大空空無處坐家
內空空空空無有貨日在空裏行日沒空裏臥空坐空吟詩詩空空相和莫怪純用
空空是諸佛座世人不別寶空即是實貨若嫌無有空自是諸佛過有人有所知有事
有是非聞道無相理心執不生疑五歲更不長祇作阿孩兒將拳口裏咬百年不肯離
假花雖端正究竟不充饑都緣癡孩子不識是權宜如來無相理有作盡皆非合瞋不
須瞋合喜不須喜喜即姪慾生瞋即毒蛇起毒蛇起猛火姪慾成貪鬼猛火和貪鬼癡

狼呷心底妄想如恒沙煩惱無遮止無明黑漆漆渴來飲鹹水終日緣事走不肯入空
理我見好畜生知是嘍羅漢枉法取人錢誇道能計算得即渾家用受苦沒人伴有力
任他騎棒鞭脊上揎觜上著轡頭口中啣鐵片項領被磨穿鼻孔芒繩絆自種還自收
佛也不能斷

癡兒無智慧自嫌阿爺醜阿娘生得身嫌娘無面首拋却親爺娘外邊逐色走六親相
將作尋常不閑口恒遊十二月月飲欲酒夜夜不曾醒醉吐飼猪狗如此惡男子緣
事不了手余有一寶劍非是世間鐵成來更不磨晶晶白如雪氣衝浮雲散光照三千
徹吼作師子聲百獸皆腦裂外國盡歸降眾生悉磨滅滅已復還生還生作金鑄古穴
帶將處處行樂者即為說知余轉般若見余轉金剛合掌恭敬了不動見空王亦勝身
命施亦勝坐天堂亦勝五臺供亦勝求西方於住而無住其福不可量有為如夢幻無
相契真常如來大慈悲廣演波羅蜜了知三界苦慫勸君出得之不肯修實是頑皮
物他是已成佛汝是當成佛當成自不成是誰之過失已後累劫苦莫尤過去佛誰家

郎君子開眼造地獄枉法取人錢養那一群賊饒伊家戶大業成出不得除非輪迴滿
換形償他力看君騎底驢總是如此色無事被鞭杖有理說不得愚人打瓮破求人望
錮護惡法得錢財布施擬補處物色不相當此事無煩做

縱然有少福那將地獄去罪福當頭行何時相值遇自本猶折却安得有利路先須持
五戒方始得人身有財將布施身即不窮貧若行十善業聞道得天人天人生滅福來
去如車輪有為接梵世不及一毫真更欲談玄妙慮恐法王瞋一皮較一皮孫子不如
兒坐禪勝讀經讀經勝有為尋文不識理棄母養阿姨阿姨是色身阿娘是法體色身
是文字法入無為理文字有生滅無相宛然爾佛教本無妄句句須論實尅己饒益他
俗所謂陰鷲遮莫是天王饒君宰相姪世間有貴賤業力還同一語汝富貴人貧兒莫
欺屈習重業力成翻覆難得出自恨己身癡有事無人知橫展兩脚睡至曉不尋思諸
佛為我爺我是世尊兒兒今已長大替父為導師父子同宅住寸步不相離法身無相
貌世人那得知此箇一群賊生生欺主人即今識汝也不共汝相親你若不伏我我則

處處說教人總識汝遣汝行路絕你若能伏我我亦不分別共汝同一身永離於生滅
世人重珍寶我則不如然名聞即知足富貴心不緣唯樂簞瓢飲無求澡鏡銓

饑食西山稻渴飲本源泉寒披無相服熱來松下眠知身無究竟任運了殘年霧重日
難出雲厚月朧朧有心求覓佛晝夜用心功見夢言將實聞真耳却聾群賊當路坐道
理若為通見性若玲瓏多求說處通取他凡聖語到頭渾是空云何為人演離相說如
如心鏡俱空靜無實亦無虛心通常嘿用出世入無餘梵釋咸恭敬菩薩亦同居語是
凡夫語理合釋迦書若能如是學不枉用工夫寅朝飲稀粥飯後兩束薪貨得二升米
支我有餘身身無饑火逼安余無相神神安佛土淨內外絕埃塵無間說般若豁達啟
關津火燒家計盡全成無事人圓鏡朗如日湧出無礙智梵語波羅蜜唐言無量義說
者說無相離者離文字但說無上道利他還自利若能入理行不動到如地緣事常區
區不如展脚睡我觀三界有有人披草舍蛇鼠同穴住白日恒如夜鳩鵲為親情羅刹
同心話五狗常嗥吠思之令人怕我觀總是幻虛空名亦假放牛喫草庵三身同一化

如來一真智徧滿娑婆界殷懃說方便有人自不解無處不生心有處多貪愛

心王作黑業教他口懺悔口懺心不改心口相違背不服無心藥病根終不差著相求
菩提不免還他債香山有栴檀寶山無伊蘭金山照毛頭毛頭百億寬淨心空室坐妙
德四方安空生知內外相事付阿難如能達此理無處即泥洹若能相用語教君一箇
訣捻取三毒箭一時總拘折田地成四空五狗牙總缺色蘊自消亡六賊俱磨滅閻羅
成法王羅刹成菩薩勿論己一身舉國一時悅達人知是幻縱損心亦如諸天不免難
況復此閻浮須尋無上理莫更苦踟躕衣食纔方足不用積盈餘少欲有涅槃知足非
凡夫當來無地獄現在出三塗外若絕攀緣歡喜常現前本來何所得吉祥自現形空
生稱長老燃燈常照明彌勒是同學釋迦是長兄神通次第坐無勞問姓名名相有差
別法身同一形大乘一等義本自無遮閉凡夫著相求心生有執滯無心為真空空寂
為本體無問亦無說常照勿使廢佛子行道已更莫愁來去無念清涼寺蘊空真五臺
對境心無垢

當情心死灰妙理於中現優曇空裏開無求真法眼離相見如來若能如是學不動出
三災常聞阿閼佛擬向東方討今日審思惟不動自然到語汝守門奴何須苦煩燥我
奏父王知與汝改名號破却有為功顯示無為道識樂眾生樂緣繩妄走作智樂菩薩
樂無繩亦無縛若有發心者直須學無作莫道怕落空得空亦不惡見鑛不別金入鑛
方知錯苦痛役身心勞神覓官職暫得色毛披拍按作瞋色口口打奴兵聲聲遣 肋
聞道送王老曲亦變成直縱令有理道分疎亦不得家長自飲酒舉家一時醉失火燒
故宅運水沃空地水火當頭發三災一時起空中鳩鵲舞驟來助放屁因中無好花結
果亦天理學道迷路人實是可憐許被賊妄牽纏惡緣取次與有法遍娑婆開眼看佛
語洗舌讀經典和經弄蛇鼠動念三界成迷失當時路身現凡夫事內照自分明三千
大千界

滿中諸眾生剎那造有業了了總知情納安芥子裏稱為無相經常持人不識念時無
色聲學佛作夢事不須論地獄天堂總越却六識為僮僕心心無所住處處塵不著五

道絕人行無心是極樂空裏見優曇眾生作橋杓欲得速成佛祇學無生忍非常省心
力當時煩惱盡七寶藏門開智慧無窮盡廣演波羅蜜無心可鄙吝祇恐著有人愚癡
自不信世人皮上點心裏沒頭癡他貪目前利焉知已後非謾胡欺得漢誇道手脚遲
走向見閻老倒拖研米槌恐君不覺悟今日報君知中人樂寂靜下土好威儀菩薩心
無礙同凡凡不知佛是無相體何須有相持但令心了事遮莫外人疑如人渴飲水冷
煖心自知識若不受塵心亦不顛狂妙智作心師名為破有王須與證六度動用五種
香此即真極樂亦是真西方釋迦無量壽同居此道場俗務不廢作內秘貪心學世上
假名聞

超然總莫著息念三界空無求出五濁法報皆圓滿意根成正覺若能如此修輪王亦
不博五蘊若實有則合有色形五蘊若實無則合無形聲祇為假名字所以妄來停若
了名相空事盡總惺惺心王無障礙擺撥三界行我是凡夫身樂說真如理為性不慳
貪常行平等施凡夫事有為佛智超生死作佛作凡夫一切自繇你耳聞無相理眼空

不受色鼻嗅無相香舌嘗無相食身著無相衣意隨無相得心靜越諸天神清見彌勒
十方同一乘無心記南北慈悲說斯法現疾為眾生純陀獻後供妙德亦同行名相有
差別法身同一形化身千萬億方從立空名不須執有法圓通最大精欲得真成佛無
心於萬物心如境亦如真智從如出定慧等莊嚴廣演波羅蜜流通十方界諸有不能
疾報汝學道人祇麼便成佛讀經須解義解義始修行若能依義學即入涅槃城讀經
不解義多見不如盲

緣文廣占地心中不肯耕田田總是草稻從何處生有人道不得是伊心王黑不能自
了事埋藏一群賊群賊多貪癡緣事說是非心王被賊使劫劫無出期見花不識樹菓
熟始應知君家住聚落余自居山谷山空無有物聚落百種有有者喫飯食無者空張
口口空肚亦空還將空喫有有盡物歸空同體無前後諸佛與眾生元來同一家不識
親尊長外面認假爺優曇不肯摘專採葫蘆花葫蘆花未落常被三五枷如斯之等類
輪轉劫恒沙余為田舍翁世上最貧窮家中無一物啟口說空空舊時惡知識總度作

師僧和合一處坐常教聽大乘食時與持鉢唯我一人供平等無有二終日同宅住世人不了妄心生外緣取取得外相佛樂却變成苦苦即諸法生大海從何渡為報知音者好好看道路故宅有寶珠却向田野求這箇一群賊賺你悠悠泥上搽粧粉壁上塗渾油

愚人見夢事讚歎道能修臘月三十日元無一物收山中失却心任運騰騰語語即說空空空中無虵鼠有心波浪起無心是淨土淨土生真佛佛還傳佛語佛能度眾生眾生是佛母心王不能了何不依真智一吼百獸伏盡見無生理無生理甚寬無心無可看非內外中間非生死涅槃諸法無住處遨遊神自安外求非是寶無念自家珍心外求佛法總是倒行人般若名尚假豈可更依文有相皆虛妄無形實是真日用事無別唯吾自偶諧頭頭非取捨處處勿張乖朱紫誰為號青山絕塵埃神通并妙用運水及搬柴意根無自性萬法本來虛外塵都不有三界自然無五蘊今何在盡總入無餘河沙過去佛並在一毛如名相本來無迷人意欲須須時權為說迷過患須除般若無是

非無實亦無虛八萬四千卷終歸同一如人有一卷經無相亦無名無人能轉讀有我
不能聽如能轉讀得入理契無生

非論菩薩道佛亦不勞成阿爺當殿坐子向前頭立父子同宅住小魔不敢入時開無
盡藏貧者相供給得之永不窮免得生憂悵欲得真醍醐三毒須去除嗅無酥酪氣自
見如意珠劫火燒不然泛海浪中浮昔日強索者今日作他奴報汝尋真理偷生佯不
聞及其身命卒心口便紛紜我命不能與將錢別僱人為讀如來教救護我精神城內
數萬戶不柰我恒一時時師子吼禽獸俱皆卒教作羅睺羅無蹤持戒律但知入理坐
日頭骨咄出

龐居士詩卷中

龐居士詩卷下

眾生多品類諸佛祇一般庶人見天子知隔幾重關若有過人策欲見亦不難策中契
聖理坐取國家官智度本來如眾生病盡除又度作護法

一切入無餘過去恒沙佛皆同此一途如能達此理凡夫非凡夫四大本無情清虛無
色聲達人悟空理知法本無生諸佛常現前妙德亦同行無無無障礙心牛不肯耕塵
六門前喚無情呼不入二彼總空空自然唇不濕從此絕因緣葛五隨緣出惟有空寂
舍圓八同金七入理如箭射尋文轉相背直道不肯行識路成迷退心王不了事公臣
生執礙為此一群賊生死如踏碓覺他欲打你著脚即須抽已後再相見他羞我不羞

忍辱第一道歷劫無冤讎此是無生縣不屬涅槃洲罵他無便宜不應却得穩無瞋神
自安罵他還自損忍得有法利罵他還折本瞋喜同一如遁世不悶悶識業人稀少迷
途者眾多苦中生樂想無喜強絃歌不飲尋常醉昏昏溺愛河含笑造殃咎後苦莫繇
他耳聞他罵詈心知口莫對惡亦不須嫌好亦不須愛豁達無關津虛空無礙此真
不動佛亦名觀自在仰手是天堂覆手是地獄地獄與天堂

我心都不屬化城猶不止豈況諸天福一切都不求曠然無所得佛有一等慈有人心
不知一切皆平等貧富總憐伊富者你莫貪貧者你莫癡無貪心自靜無癡意莫思白
衣不執相真理從空生祇為心無礙智慧出縱橫唯論師子吼不許野干鳴菩提稱最
妙猶呵是假名從根誅則絕從根修則滅若能雙株斷三乘盡超越此非凡夫言妙吉
分明說如來所療治一差不復發久種善根深同塵塵不侵非關塵不染自是我無心
無心心不起超三越十地究竟真如果到頭祇箇是凡夫智量狹妄說有難易離相如
虛空盡契諸佛智戒相如虛空迷人自作持病根不肯拔執是弄花枝牽牛駕空車共

入無為宅無為宅甚寬眾生却嫌窄十方同一室何曾有間隔有法人不得無心自度
厄世間最上事唯有修道強若悟無生理三界自消亡蘊空妙德現無念是清涼此即
彌陀土何處覓西方寶珠內衣裏繫來無量時遇六惡知識

又常假慈悲牽我飲酒醉臥都不知情盡酒復醒自見本道師世人重珍寶我貴剎
那靜金多亂人心靜見真如性性空法亦空十八絕行蹤但自心無礙何愁神不通端
坐求如法如法轉相違拋法無心取始自却來歸無求出三界有念則成癡求佛覓解
脫不是丈夫兒惡心滿三界口即念彌陀心口相違背群賊轉轉多一塵起萬境倏忽
遍娑婆色聲求佛道結果盡成魔萬法從心起心生萬法生法生有日了來去枉虛行
寄語修道人空生有莫生如能達此理不動出深坑佛亦不離心心亦不離佛心寂即
菩提心然即有物物即變成魔無即無諸佛若能如是用十八從何出羊車誘下愚鹿
車載中夫大乘為上士鵬巢鶴不居鷦鷯住蚊睫居士咄盲驢若論質利帝畢竟一乘
無有人嫌龐老龐老不嫌他開門待知識知識不來過心如具三學塵識不相和一丹

療萬病不假藥方多淼淼長江水周而還復始昏昏三界人

輪迴亦如此輪迴改形貌長江色不異改貌勞神識終須到佛地睡來展脚睡悟理起
題詩詩中無別意唯勸破貪癡貪瞋癡若盡便是世尊兒無煩問師匠心王應自知世
人重名利余心總不然束薪貨升米清水鐵鐺煎覺熟捻鐺下將身近畔邊時時拋入
口腹飽肚無言行學非真道徒勞神與軀千里尋月影終是枉工夫不悟緣聲色當今
學者疎但看起滅處此箇是真如教君殺賊法不用苦多方慧劍當心刺心亡法亦亡
心亡極樂國法亡即西方賊為象馬用神自作空王不用苦多聞看他彼上人百憶及
日月元在一毛塵心但寂無相即出無明津若能如是學幾許省精神慚愧好心王生
在蓮華堂恒持般若劍終日帶浮囊常懷第一義外國賴恩光五百長者子相隨歸故
鄉慚愧好意根無自亦無他無自身無垢無他塵不加常居清淨地知有不能過舊時
惡知識總見阿彌陀慚愧好舌根常開大道門世間三有事

實是不能論相逢唯說道更莫敘寒溫了知世相假俗禮也徒煩慚愧一雙耳常思解

脫聲若論俗語話實是不能聽聞財耳不納聞色心不生不受有無語何慮不惺惺慚愧一雙眼曾見數般人端正亦不愛醜陋亦不瞋當頭異國色何須妄起塵低頭自形相都無一處真身心如幻化滿眼沒怨親慚愧一軀身梵號波羅柰被賊一群使尋常不自在亦名為枯井亦名為鞴袋亦名朽故宅亦名幻三昧佛罵作死屍乘屍渡大海大海元無水死屍非是船熟看世上事總是假因緣若了身心相空裏任橫眠具此六慚愧實是不求天一時復一時步步向前移無常有限分早晚即不知古人一交語預辦沒貧兒聞少須修道莫待衰老時邂逅符到來賺你更無疑勸君不肯聽三塗真可悲一日復一日百年漸漸畢急急除妄想無念成真佛更莫苦攀緣窺他世上物忽然無常至累劫出不得一宿復一宿光陰漸漸促報你心王道依智莫依識依智見真佛依識入地獄

若淪六趣中受苦無時足一年復一年務在且遷延皮皺緣肉減髮白髓枯乾毛孔通風過骨消椽栢寬水微不耐熱火少不耐寒幻身如聚沫四大亦非堅更被癡狼使無

明曉夜煎惟知念水草心神被物纏云何不懺悔便道捨財錢外頭遮曲語望得免前
愆地獄應無事準擬得生天世間有這屬冥道不如然除非不作業當拔罪根源根空
塵不實內外絕因緣積罪如山岳慧火一時燃須臾變灰燼永劫更無煙迷時三界有
悟即出囂纏心無六入跡清淨達本源地獄成淨土招手別諸天報語三塗宅共你更
無緣非論早與晚悟理即無邊心如即是坐境如即是禪如如都不動大道無中邊若
能如是達所謂火中蓮無求乃法眼有念却成魔無求復無念即是阿彌陀真如共菩
薩總祇較無多鍊盡三山鐵鎔銷五岳銅林枯鳥自散海竭絕魚龍無師破戒行有法
盡皆空菩薩無煩惱眾生愛皺眉無惱緣無賊皺眉被賊欺不須問師匠心王應自知
智者觀財色了知是幻虛衣食支身命

相勸學如如時至移庵去無物可盈餘凡夫貪著事不免三界輪與說無生理閉耳佯
不聞如斯之等顛何日出囂塵壁[廌]枉用色不如脫空佛住法比無住陰中對白日不
信有無言看取波羅蜜見時如不見聞時如不聞喜時如不喜瞋時如不瞋一切盡歸

如自然無我人齋須實相齋戒須實相戒有相持齋戒到頭歸敗壞敗壞屬無常從何
免三界心王不了事遮莫向名山縱令見佛像實以不相關猿猴見水月捉月始知難
緣事求解脫累劫無出期直須入理性成佛更無疑雖然不受記見是世尊兒佛遣滅
生滅生滅長相隨不學大人相却作小孫兒持心更覓佛豈不是愚癡無事被他罵佯
佯耳不聞舌亦不須動心亦不須嗔關津無障礙即是出纏人真如本無相所得是凡
流昔時為父子長大出外遊今日相遇見父少子白頭一生解縛鈍渾身納裏眠心中
無意識耳無繩索牽心本無繫縛同塵亦無喧欲得真解脫持刀且殺牛牛死人亦亡
佛亦不須求全身空裏坐即度死生流極目觀前境寂寥無一人迴頭看後底

影亦不隨身貪瞋不肯捨徒勞讀釋經看方不服藥病從何處輕取空是取色取色色
無常色空非我有端坐見家鄉經體本無名受持無色聲心依無相理真是金剛經孫
兒正啼哭母言來與金捻他黃葉把便即正聲音別淚成河海骨如毗富山祇緣塵識
法所以遣心然前人若有事我猶佯不知何況他無問讒舌強卑卑勸君師子吼莫學

野干鳴若能香象起感得鳳凰迎一種學事業亦來登選場祇緣口義錯落第在他鄉
心王不了事却被六賊使共賊作火下無繇出生死別人終不賤別寶終不貧祇今擔
鐵漢不肯博金銀十方同一會各自學無為此是選佛處心空及第歸有男不肯婚有
女不肯嫁父子自團圓

共說無生話四性同一舍三身同一室一切惡知識總見彌陀佛教君一箇法有事無
處避若能如理修存本却有利道是無為道修人自有為假即無頭數真中實是稀無
求勝禮佛知足勝持齋本自無薪火何勞更拾柴說事滿天下入理實無多常被有為
縛何日見彌陀起時惟法起行時共佛行騰騰三界內諸法自無生大海淼無涯眾生
自著枷無求出妙德心生勞算沙一念心清淨處處蓮花開一華一淨土一土一如來
七言七言大唐三百六十州我暫放閑乘興遊瞬息之間知事盡若論入理更深幽共
外知識呷清水總是妄想無骨頭却歸東西山道去不捨因緣騎牯牛後望青山平似
掌前瞻漢水水東流試問西域那提子遺法殷懃無所求

自入大海歸火宅不覺乘空失却牛有人見我歸東土我本元居西海頭來去自然無
障礙出入生死有何憂無思無念是真空妙德法身自見中應機接物契真智十方世
界總流通通達無我無人法人法不見有行蹤神識自然無罣礙廓周沙界等虛空不
假坐禪持戒律超然解脫豈勞功菩提般若名相假涅槃真如亦是虛欲得心神真解
脫一切名相本來無十方世界風塵淨州州縣縣絕艱虞王道蕩蕩無偏黨舉國眾生
同一如不動干戈安萬姓法王合掌髻中珠空中自見清涼月一光普照娑婆徹此光
湛然無去來不增不減無生滅爾是妙德現真身刹那不起恒沙劫無邊無盡如虛空
虛空無邊不可說但自無心於萬物何妨萬物常圍遶鐵牛不怕師子吼恰似木人見
花鳥木人本體自無情花鳥逢人亦不驚心境如如祇箇是何慮菩提道不成清淨無
為無識塵不捨肉身妙法身祇為眾生有漏習權止草庵轉法輪法輪常轉無人見優
曇時時一出現

無相真空妙法身歷劫恒沙不遷變莫求佛兮莫求人但自心裏莫貪瞋貪瞋癡病前

頓盡便是如來的的親內無垢兮外無塵中間豁達無關津神無障礙居三界恰似瑠璃處日輪心王若解依真智一切有無俱遣棄身隨世流心不流夜來眼睡心不睡天堂地獄總無情任運幽玄到此地報汝世人莫癡憨暫時權住此草庵無想衣食飽暖後世間有物不須貪此身幻化如燈燄須臾不覺即頭南一切有求枉用功想念真成著色空差之毫𠄎失千里有生劫劫道難通癡心望出三界外不知元在鐵圍中十二部經兼戒律執相依文常受持生生獲得有為果隨在三界無出期若能離相直入理中無念亦無思貝多葉裏優曇華萬象皆如同一家歡喜摘華不見菓吉祥採菓不觀華緣之本來元不識法王呵之如稻麻田舍老翁入聚落眼耳鼻舌俱失却內外尋訪覓無蹤舊時住處空寂寞却歸堂上問空王總在此間學無作黃葉飄零化作塵本來非妄亦非真

有情故宅含秋色無名君子湛然春未識龍宮莫說珠從來言說與君殊空拳祇是嬰兒信豈得將來誑老夫迷時愛欲心如火心開悟理火成灰灰火本來同一體當知妄

盡即如來真為家貧無一物此語總是空裏出出語還須歸本源不敢違他過去佛父子相守空山坐無相如如寄有間世人見靜元無靜看似閑時亦不閑八萬四千同一理事相差別立異名十二圍陀及疏論慇懃三六不須生十方國土皆吾宅長者大門常日開有識名人守院外無心入理見如來世人愛假不愛真世人憐富却憎貧唯敬三塗八不淨背却如來妙色身更無別路超生死前佛後佛同一般舒即周流十方剎斂時還在一毛端惟有一門無鑰匙伸縮低昂說是非但能宣得無生理善巧方便亦從伊二乘皆曰不堪任上士之人智慧深欲得神通等居士無過於物總無心

雜句雜句

行路易。行路易。內外中間依本智。本智無情法不生。無生即是入正理。非色非心放一光。空裏優曇顯心

地。名為智。智為尊。心智通同達本源。萬物同歸不二門。有非有兮理常存。無非無兮無有根。未來諸佛亦如是。現在還同古世尊。三世俱皆無別道。佛

佛相授至今傳。

外無他兮內無自。不動干戈契佛智。通達佛道行非道。不捨凡夫有為事。有為名相盡空華。無名無相出生死。

余有一大衣。非是世間絹。眾色染不著。晶晶如素練。裁時不用刀。縫時不用線。常持不離身。有人自不見。三千世界遮寒暑。無情有情悉覆遍。如能持得此大衣。披了直入空王殿。思思低思思。自歎一雙眉。向他勝地坐。萬事總不知。六識若似眉。即得不思議。六識若嫌眉。論時沒腦癡。伊若去却眉。即被世人欺。饒你六識嘍囉漢成乞索兒。

出一屋。入一屋。來來去去教他哭。來去祇為貪瞋癡。于今悟罷須知足。知足常須達本源。去却昔時惡知識。惡知識將伊作手力。法施無前後。共護無生國。

無事失却心。走向門前覓。借問舊知識。寂絕無蹤跡。却歸堂上審思看。改

却眾生稱心安。不能出外求知識。自向家中入涅槃。大丈夫。昔日有。今日無。家計破除盡。贖得一群奴。奴婢有六人。一人有六口。六六三十六。常隨我前後。我亦不拘伊。伊亦不敢走。若道菩提難。菩提亦不難。少欲知足毛頭寬。遠離財色神自安。分明了見三塗苦。世上名聞不相關。

難復難。持心離欲貪涅槃。一向他方求淨土。若論實行不相關。枉用工夫來去苦。畢竟到頭空色還。

易復易。即此五陰成真智。十方世界一乘同。無相法身豈有二。若捨煩惱覓菩提。不知何方有佛地。

正中正。心王如如六根瑩。六塵空。六識淨。六六三十六。同歸大圓鏡。阿難貝多葉。持來數千劫。七寶藏中付迦葉。分為十二部。析作三乘法。非故亦非新。應化隨緣百億身。若有真如一合相。一億還同一聚塵。

珠從藏中現。顯赫呈光輝。昔日逃走為窮子。今日還家作富兒。

心依真智。理逐心行。理智無礙。心亦無生。迷即有我。悟即無情。通達大智。諸法不成。五神無主。六國安寧。七死弗受。八鏡圓明。隨宜善化。總合佛經。過即已過。更莫再尋。現在不住。念念勿侵。未來未至。亦莫預斟。既無三世。心同佛心。依空默用。即是行深。無有少法。觸目平任。無戒可持。無垢可淨。洞達虛心。法無壽命。若能如是。圓通究竟。

居士見僧講金剛經。至無我無人。居士問云。既無我無人。是誰講。誰聽。座主無語。居士乃與頌曰。

無我復無人。作麼有疎親。勸師休歷座。不似直求真。金剛般若性。外絕一纖塵。我聞并信受。總是假名陳。

歷代讚文（并諸方拈古附）歷代讚文并諸方拈古附

大丞相張天覺大丞相張天覺寧可饑寒死路邊不勞土地強哀憐滿船家計沉湘水
豈羨芒繩十百錢

徑山佛日大慧禪師徑山佛日大慧禪師無生本無說說著即話墮骨肉團欒頭大虫
看水磨

舉。居士問馬大師。不與萬法為侶者是什麼人。大師云。待汝一口吸盡西江
水却向汝道。

東林珪老東林珪老大海波濤淺小人方寸深海枯終見底人死不知心

雲門杲公禪師雲門杲公禪師一口吸盡西江水甲乙丙丁庚戌己咄咄咄囉囉哩
白雲端和尚白雲端和尚一口吸盡西江水萬古千今無一滴要須黨理不黨親馬祖
可惜口門窄

舉。居士問仰山。久嚮仰山。到來為什麼却覆。仰山豎起拂子。居士云。恰
是。仰山云。是仰是覆。居士拍露柱一下。云。雖無人見。露柱與我證明。
仰山擲下拂子云。一任舉似諸方。

兩箇八文為十六從頭數過猶不足拏來亂撒向階前滿地團團春蘚綠

龐居士詩卷下終